



ТРОПАРЬ

Иже во святых мученик Твоих, служитель Алтаря Господня верный,
даже до крове за Христа подвижался еси, молитвенниче наш сердный.
Сего ради Престолъ Царя Славы предстоиши, но и нас не забывай,
творящих память твою, священномучениче Заре.



КАНОН
СВЯЩЕННОМУЧЕНИКУ УАРУ,
ЕПИСКОМУ ЛИПЕЦКОМУ

ПЕСНЬ 1

Ирмос: Воду прошед, яко сушу, и египетскаго зла избежав, израильтянин вопияше: Избавителю и Богу нашему поим.

Припев: Священномучениче Уаре, моли Бога о нас! Свещильника многосветла, лучами Духа Святаго озаряема, Церковь стяжа тя, священномучениче Уаре, святителю Липецкий. Тем днесь, память твою совершающе, добродетелей твоих сияньми вернии богато просвещаются.

От матерних пелен возложил еси себе всех Владыце, благословиению святаго Питирима последуя, и умерщвлением страстей жива Подвигоположника Христа жертва был еси, закалая себе без крове, Уаре преблаженне.

Слава: Житие твое сияет ю добродетельми пастырства вельми преукрашено ю близ града Лебедяни, и твердое за Христа страдание проявлена ты в Церкви Божией священномученика всем показывает.

И ныне: Храм Ты была еси Преукрашенный, Нескверная Отроковице, Всельшемуся паче ума в Тя, Богородице, и леть от душ человеческих отгнавшего.

ПѢСНЬ 3

Ирмос: Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, Едине Человеколюбие.

Спасительная и благочестная учения Православная, невредимом храня, святителю Уаре Богоглаголиве, врученное ти стадо словесных Христовых овец упасл еси на пажитях живоносных и в Небесную Ограду мученической смертию возшел еси.

Возшед на высоту добродетелей, Уаре премудре, помазание Духа Святаго священнотайне в хиротонии приял еси. И превысочайших благ Подателя восхвалил еси, послужив Тому яко ангел и агнец незлобивый, в подвизах исповедания Патриарху Тихону подражая.

Слава: Напасти безбожных властей и истязания лютыми недуги помраченных претерпел еси Христа ради, Уаре великоимените, бессмертия приобщился еси и обожения, миро благовонное молитв твоих непрестанно источая с верою к тебе притекающим.

И ныне: Угля Божественнаго и светозарнаго Клеще, Купино, огнем неопалившаяся Божества, вся попали моя страсти душевныя и телесныя и огня исхитити вечнующаго.

СѢДЛЕН, ГЛАС 3

Днесь возсия паче денницы честная память архипастыря и страдальца Христова Уара, священномученика и исповедника Липецкаго, православных сердца благодатию Духа просвещающи и облацы душевных страстей отгоняющи. К нему же, мучениколюбцы, воззовем: радуйся иже верным явне Богодарованный теплый ходатаю, радуйся в невечернем дни Царствия Божия предстоящий и о нас молящийся, радуйся граду Липецку и Отечеству нашему заступниче скоропослушливый, радуйся Уаре, отче наш великоимените!

Слава, и ныне, Богородичен.

Божественнаго естества не отлучайся, Един от Святыя Троицы плоть быв во чреве Твоем, но Бог, вочеловечився, пребысть, иже по рождестве Матерь Тя и Деву чудесне сохранив. Того прилежно моли даровати нам велию милость.

ПѢСНЬ 4

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Земледелав ниву твоего разума Духа Святаго силою, стократный плод принесл еси Христу, Жениху Церковному, Уаре богомудре. В добродетелях Божественных нищих нас, наставив, обогати, исцеляя душевных и телесных недуг множество.

Святому страстотерпцу Никите великоименитому добрый подражатель в житии твоем явился еси, Уаре, блаженне архипастырю наш. С ним же престолу Божию на небесах предстоя, светом веры, надежды, любви и мудрости осияй души наша.

Слава: Недугов многоразличных очищение, лукавых демонов удаление подаждь нам, пастырю наш предобрый, Уаре священномучениче, присно бо верным чадам Церкви Христовы богодарованное прибежище был еси.

И ныне: Всеми Невместимый, Пречистая, вмещается во утробе Твоей, спасая благодистию Своею нас, многими грехи оскверненных.

ПѢСНЬ 5

Ирмос: Вскую мя отринул еси от лица Твоего, Свете Незаходимый, и покрыла мя есть чуждая тьма окаяннаго, но обрати и мя к свету заповедей Твоих, пути мои направи, молюся.

Умом чистейшим созерцая всяк Ум Преимущаго, от Него приял еси дарований зарю святительство, Боговдохновенне отче Уаре. Безумие еретиков обличил еси и нас светом Евангелия просвети, моляся о спасении

нашем, ревнуя об имени Церкви Студеновския и душу за пасомых полагая.

Прелестьми демонскими словесныя овцы стада твоего прельщающих, огненному суду предал еси праведно, блаженне Уаре, и души верных избавил еси всегубительнаго сего вреда, яко пастырь истинен и душепопечителен.

Слава: Разгоревшуюся огню богоборчества сатанинскаго, посреде стал еси неопалим, преславне святителю Уаре, Божественная бо роса Святаго окружи тя Духа, яко священнотаинника и служителя Божественныя славы, и вышня Светлости причастника.

И ныне: Видевше Божествен не древле, Богодарованная, честнии пророцы таинства глубину неизреченную Рождества Твоего, Пречистая, различными образы, якоже вместиша и можаху, Сего провозвестиша.

ПѢСНЬ 6

Ирмос: Молитву пролию ко Господу и Тому возвещу печали моя, яко зол душа моя исполнися и живот мой аду приближися, и молюся, яко Иона: от тли, Боже, возведи мя.

Слепотствующия духовно, молитвами твоими, Уаре, архипастырю наш, прияша прозрение в познании Христа, Бога истинна. Егоже содейственника имея, и к Нему молитвы твоя вознося, умножи паству твою Христоименитую.

Был еси богохульникам и богоотступникам страшен, пречудне отче Уаре. Обличил еси зломыслие их, и на суде во граде Воронеже нечестивых посрамил еси. Темже мученическую кончину от рук безбожных, кротко прияв, от Бога прославлен еси. Егоже всем житием твоим, блаженне, прославил еси.

Слава: Благоухает дарами Духа Всесвятаго священная память твоя и изливает присно, всеблаженне святителю Уаре, якоже источник чистый и благовонный, елей

богоприятных молитв твоих, имиже отгоняются недужи от верных и здравие требующим даруется.

И ныне: Освяти душу мою, Дево, Всесвятое рождшая Слово, воистину во святых почивающа, и даруй ми, яко Милостива, умиления росу, Всенепорочная.

Нижеследующие кондак и икос читаются в том случае, если не читается акафист.

КОНДАК, глас 3-й

Пастыреначальнику Христу подражая, за врученное ти стадо душу свою положил еси Уаре, архипастырю и мучениче, молитвами твоими паству твою соблюди невредиму от всех навет вражиих, да зовем ти: Радуйся, священномучениче Уаре, архипастырю наш пречудный и покровителю края Липецкаго.

Икос: Избранный от Пастыреначальника и Верховнаго Архиерея нашего Христа Иисуса, града Липецка первопастырю и всему краю заступниче и ходатаю, Святителю отче наш Уаре, восхваляюще Агнца Божия, увенчавшаго Тя венцем мученическим, благодарственное Тому приносим пение. Ты же, яко пастырь добрый, душу за овцы словесныя положивый, в вере, надежде и любви утверди нас, зовущих:

Радуйся, священномучениче Уаре, архипастырю наш пречудный и покровителю края Липецкаго.



АКАФИСТ
СВЯЩЕННОМУЧЕНИКУ УАРУ,
ЕПИСКОМУ ЛИПЕЦКОМУ

КОНДАК 1

Избранный Богом от юности в пастыри стада Христова, / душу твою любви ради Божия не пощадивый / и мученической кончиною силу веры твоея явивый, / ныне Престолу Царя Славы во славе предстоящи, / поминай нас, чтущих святую память твою и верою тебе зовущих: *Радуйся, Уаре, сонма новомучеников украшение и молитвенниче о душах наших.*

ИКОС 1

Ангельския силы возрадовашася о тебе, пастырю Христов пречудне, мученик бо добльственный за имя Иисуса Сладчайшаго явился еси, да кровию твоею Церковь Православная укрепится и множае плоды правды принесет. Вернии же, страдания твоя за Христа ублажающе, восписуют ти таковая:

Радуйся, мучеников сопричастниче;
Радуйся, святителей сопрестольниче.
Радуйся, Христов воине крепкий;
Радуйся, духами тьмы неборимый.
Радуйся, тесным путем шествовавый;
Радуйся, чашу страданий за Христа испивый.
Радуйся, яко безсмертия приобщился еси;
Радуйся, яко в радости вечней пребываеши.

Радуйся, Церкви Русския украшение;
Радуйся, града Липецка похвало.
Радуйся, за Отечество наше предстателю верный;
Радуйся, за чтущих тя молитвенниче усердный.
*Радуйся, Уаре, сонма новомучеников украшение и
молитвенниче о душах наших.*

КОНДАК 2

Видяще тя благоразумием измладенчества паче
иных преукрашена, возыме иерей благочестивый о тебе
попечение, желающе тя служителем Олтаря Господня
видети, взывающа Богу по вся дни: *Аллилуиа.*

ИКОГ 2

Разумом Божественным свыше одаренный, сан священнический приял еси вскоре, Уаре богомудре, и в страну Финскую послан был еси. Паства же тая, пастыря добраго в тебе обретше, зело тя возлюбиша. Таковое убо попечение твое о пасомых похваляя, глаголем ти сицевая:

Радуйся, измлада Богом избранный;
Радуйся, на служение пастырское призванный.
Радуйся, добродетелей всяческих исполненный;
Радуйся, проповедь словом и делом творивый.
Радуйся, неленостно Богу служивый;
Радуйся, любовь нелицемерную к ближним явивый.
Радуйся, странных пристанище;
Радуйся, убогих попечение.
Радуйся, врачу немздоприимный;
Радуйся, утешителю озлобленных.
Радуйся, яко стадо Христово добре пасл еси;
Радуйся, яко тое к небеси неозвратно вел еси.
*Радуйся, Уаре, сонма новомучеников украшение и
молитвенниче о душах наших.*

КОНДАК 3

Силою Божиею укрепляемь, священномучениче Уаре, неисчетныя скорби семейныя пренесл еси и гонения от властей безбожных, обаче всего себе и ближних твоих в руке Божии предав, не преста Ему взывати: *Аллилуиа.*

ИКОС 3

Имея веру несумненную, не убоялся еси прещений лютых, ниже склонился еси к лести безбожных, сана священническаго ты отреченна видети хотящих, сего ради и многая блага тебе сулящих. Ты же, отче, горняго взыскуя, вся красная мира сего презрел еси. Темже ныне ты ублажаем:

Радуйся, земная презревый;

Радуйся, небесная возжелавый.

Радуйся, яко любовь к миру отринул еси;

Радуйся, яко любовью Божиею вся победил еси.

Радуйся, адаманте веры несокрушимый;

Радуйся, ласкательства лестнаго не приемый.

Радуйся, угрозы презревый;

Радуйся, нечестивым не покоривыйся.

Радуйся, Христа прославивый;

Радуйся, сатану посрамивый.

Радуйся, щите, защищай благочестие;

Радуйся, оружие правды, обличаяй нечестие.

Радуйся, Уаре, сонма новомучеников украшение и молитвенниче о душах наших.

КОНДАК 4

Бури злословия и зложелательства не убоялся еси, Уаре достохвальне, егда во время разорения монастырей

чин ангельский приял еси, и во исповедничестве святому покровителю твоему мученику Уару подражал еси, непрестанно поя Богу: *Аллилуиа*.

ИКОГ 4

Слышаще твое веры Христовы небоязненное провозвестничество, вдал есть тебе собор святителей жезл архиерейский и паству Липецкую твоему смотрению вручи. Таковому убо о тебе промышлению Божию радуешься, пение приносим сицевое:

Радуйся, единого Христа всем сердцем возлюбивый;

Радуйся, за Христа пострадати возжелавый.

Радуйся, во дни гонений монашество приявый;

Радуйся, первый епископе Липецкий.

Радуйся, медоточивая уста Христовы;

Радуйся, маловерных утверждение.

Радуйся, суемудрие безбожное обличивый;

Радуйся, одержимых страхом ободривый.

Радуйся, яко не убоялся еси власти богоборческа;

Радуйся, яко безбожницы не поколебаша тя.

Радуйся, исповедниче Христов;

Радуйся, от священнаго сана не отрекшийся.

Радуйся, Уаре, сонма новомучеников украшение и молитвенниче о душах наших.

КОНДАК 5

Боготечное светило явился еси во граде Липецке, Уаре досточудне, егда на защиту оскорбляемых и угнетаемых Матере нашей Церкви Православныя встал еси, научая верных, гонений не страшася, пети Богу: *Аллилуиа*.

ИКОГ 5

Видяще чад Церкви Русския волками хищными ересью раскола обновленческаго расхищаемых, пагубное

зловение сие обличил еси, паству твою верность Святей Апостольстей Церкви хранить призывая. Сего ради тако ты восхваляем:

Радуйся, чистоты Православия ревнителю;

Радуйся, верных чад Церкви охранение.

Радуйся, учителю благочестия;

Радуйся, просвещение помраченных.

Радуйся, злохулителей истребление;

Радуйся, в овчих шкурах приходящих отгнание.

Радуйся, ересей и лжеучений губителю;

Радуйся, вертограда Христова ограждение.

Радуйся, Божественнаго разума исполненный;

Радуйся, в явлении силы духа говоривый.

Радуйся, имже козни духов тьмы побеждаются;

Радуйся, имже вернии светом веры просвещаются.

Радуйся, Уаре, сонма новомучеников украшение и молитвенниче о душах наших.

КОНДАК 6

Проповедуют вси вернии подвизи твоя, Уаре всеблаженне, яко прещения огненнаго не убоялся еси и в страданиях Христовых с радостию велиею часть приял еси. Ныне же в славе Его торжествуеши, воспевая Ему: *Аллилуиа.*

ИКОС 6

Возсиял еси светло пастве твоей, святителю Уаре, светильник быв присногорящий, Господом возжженный, да сущии во тьме и сени смертней просветятся, и тьма неверия малое стадо Христово не обымет. Сего ради прими от чтущих тя таковая:

Радуйся, за имя Христово злословимый;

Радуйся, блаженство гонимых ради правды улучивый.

Радуйся, сосуде Богоизбранный;

Радуйся, изобильно благодати исполненный;
Радуйся, в горниле страданий очищенный;
Радуйся, в славе небесней почивый.
Радуйся, яко пред Господом предстоиши;
Радуйся, яко в невечернем свете ныне сияеши.
Радуйся, теплый о нас ходатаю;
Радуйся, духом с нами пребывающий.
Радуйся, имже гнев Божий на милость преклоняется;
Радуйся, имже малодушнии в вере укрепляются.
*Радуйся, Уаре, сонма новомучеников украшение и
молитвенниче о душах наших.*

КОНДАК 7

Хотя паче жизни временная жизнь вечную улучшить,
не смутился еси духом, лжесвидетельства от собратий
твоих приемля; Рекшему же, яко «блаженни есте егда
поносят вам и изженут, и рекут всяк зол глагол на вы
лжуще, Мене ради», воспел еси: *Аллилуиа*.

ИКОС 7

Новую отрасль Церкви Святыя многосветлую, Духа
Святаго благодатию просвещенную, ведаем тя, святителю
отче наш Уаре, мужество твое похваляем, исповедничеству
твоему радуемся; веру, надежду и любовь твою величаем,
воспевая ти таковая:

Радуйся, Христу сораспявыйся;
Радуйся, мученический венец приемший.
Радуйся, утешение на Небеси получивый;
Радуйся, молитвами твоими нас утешающий.
Радуйся, яко мир и долгоденствие чтущим тя даруеши;
Радуйся, яко неведущих Бога к покаянию приводиши.
Радуйся, яко первее Царства Божия искати учиши;

Радуйся, яко заблуждших в лоно Церкви возвращаеши.

Радуйся, теплохладныя и лукавыя обличай;

Радуйся, мрак бесовския прелести разгоняй.

Радуйся, крест архиерейский с честью пронесый;

Радуйся, небесный покровителю града Липецка.

Радуйся, Уаре, сонма новомучеников украшение и молитвенниче о душах наших.

КОНДАК 8

Странник и пришлец был еси в мире, святителю Уаре. Тем же ничтоже возмогло тя от любви Божия различити: ни скорбь, ни теснота, ни гонения, ни глад, ни нагота, ни смерть самая; претерпевая бо сия, за вся Богу хвалу воздавал еси, поя: *Аллилуиа.*

ИКОС 8

Весь исполнь любви Христовы, брань от мира, плоти и диавола препобедил и в радость вечноблаженную вшел еси, и нас сирыми не оставил еси, источая молитвами твоими благодеяний множество. Мы же, благодарни сущи, вопием ти:

Радуйся, угрозы и мучения нивчтоже вменивый;

Радуйся, чашу горькую сладце испивый.

Радуйся, иже в узах Бога благодарил еси;

Радуйся, иже все упование Нань возложил еси.

Радуйся, в волю Его всеблагую себе предавый;

Радуйся, венцем нетленным на Небеси украшенный.

Радуйся, яко в терпении души стяжати научаеши;

Радуйся, яко выну Бога хвалити вразумляеши.

Радуйся, в нуждах к тебе притекающим помощниче;

Радуйся, в обстояниих сущим укрепление.

Радуйся, изгнанных имени Божия ради утешающий;

Радуйся, в трудах и молитвах образ нам показующий.

Радуйся, Уаре, сонма новомучеников украшение и молитвенниче о душах наших.

КОНДАК 9

Вся испытанія с терпением велиим пренесл еси, святителю Уаре, веруя, яко не без воли Божией страдания сия бывають и ко славе Его обратитися имут. Ныне же со всеми от века Богу угодившими, поеши Ему: *Аллилуиа.*

ИКОС 9

Ветии многовещаннии изрещи недоумеют ревность твою апостольскую, во граде Липецке в смутные дни явленную. Тя бо Господь страдальца новаго, силою духа древним подобнаго, явил есть верным на утверждение, граду же и стране нашей на заступление. Сего ради приими пение похвальное:

Радуйся, Православия твердый исповедниче;

Радуйся, Церкви Христовы немолчная уста.

Радуйся, храмов Божиих любителю;

Радуйся, Таинств благоговейный совершителю.

Радуйся, блаженство кротких наследивый;

Радуйся, правдою Божиею на Небеси насыщенный.

Радуйся, светом добродетелей возсиявый;

Радуйся, души заблуждшия взыскавый.

Радуйся, яко душевныя страсти исцеляеши;

Радуйся, яко благодатию Духа Святаго просвещаеши.

Радуйся, Божия премудрости проповедниче;

Радуйся, чудес благодатных источниче.

Радуйся, Уаре, сонма новомучеников украшение и молитвенниче о душах наших.

КОНДАК 10

Спасти хотяй паству твою, истинным пастырем в нелицемерней любви, в слове истины, в силе Божией, с

оружием правды в руку твою, в чести и безчестии, похвалах и порицаниих был еси, поя Подателю благих: *Аллилуиа.*

ИКОС 10

Стена крепчайшая буди нам, отче Уаре, молитвами твоими. Тя бо имамы покровителя новаго града Липецка и всея страны нашея. Ведуще же, сколь удобопреклонен Господь к молитвам мученик Своих, зовем ти:

Радуйся, дерзновенный наш ходатаю у Престола Божия;

Радуйся, незримо благословляющий чтущия тя.

Радуйся, яко Господь молитвы твоя приемлет;

Радуйся, яко сильно твое к Богу ходатайство.

Радуйся, страны нашея ограждение;

Радуйся, верным христианом радование.

Радуйся, пастырей веселие;

Радуйся, в трудах им вспоможение.

Радуйся, лику мучеников сопричтенный;

Радуйся, на небеси и на земли прославленный.

Радуйся, славы небесныя причастниче;

Радуйся, ангелов достойный сожителю.

Радуйся, Уаре, сонма новомучеников украшение и молитвенниче о душах наших.

КОНДАК 11

Пение немолчное тебе приносим, святителю Христов, яко на крови мученик Церковь Русская ныне возрождается, на молитвенное предстательство пред Престолом Господа святых угодников Его уповая, поя Ему: *Аллилуиа.*

ИКОС 11

Светозарная луча во мраце жития сущим явился еси, святителю Уаре, верным путь в селения горняя указуя,

душу же твою за них положил еси и воздаяние велие от Господа восприял еси. Приими убо и от нас благохваления сия:

Радуйся, светильниче многосветлый;

Радуйся, Святым Духом озаренный.

Радуйся, рабе Божий, благий и верный;

Радуйся, вшедший в радость Господа твоего.

Радуйся, яко ныне на Небеси веселишися;

Радуйся, яко славу Божию созерцаеши.

Радуйся, на пире брачном ликовствующий;

Радуйся, от плодов райских вкушающий.

Радуйся, яко моления наша слышиши;

Радуйся, яко их во благо исполняеши.

Радуйся, звездо, на небе церковнем светло сияющая;

Радуйся, луче Божия, верных просвещающая.

Радуйся, Уаре, сонма новомучеников украшение и молитвенниче о душах наших.

КОНДАК 12

Благодать Божию стяжавый, соль земли показался еси воистину, торжество Православия кончиною твоею являя. Суетность же мира сего и утех его показуя, житием твоим Триединого Бога прославлял еси, Ему же вкупе с тобою поем: *Аллилуиа*.

ИКОГ 12

Поюще житие твое богоугодное и велие твое на небеси и на земли прославление, и молитвами твоими от Источника в жизнь вечную текущаго испивше, приносим ти таковая хваления:

Радуйся, чистотою жития просиявый;

Радуйся, святость души твоя житием явивый.

Радуйся, праведности дивное благоухание;

Радуйся, небоязненный обличителю неправды.

Радуйся, сокровище благодати;

Радуйся, источниче чудес.
Радуйся, кладезю неисчерпаемая помощи;
Радуйся, роса, оживляющая души.
Радуйся, утешение в скорбех;
Радуйся, потребление печалей.
Радуйся, яко на твою милость уповаем;
Радуйся, яко спастися твоими молитвами чаем.
*Радуйся, Уаре, сонма новомучеников украшение и
молитвенниче о душах наших.*

КОНДАК 13

О, прехвальный угодниче Христов, священномучениче Уаре, приими моления наша недостойная, от усердия тебе возносимая, и твоим благоприятным ходатайством умоли Господа Вседержителя от геенны нам избавитися и в рай со святыми вселитися, да воспоем Ему: *Аллилуиа.*

Этот кондак читается трижды, затем икос 1 и кондак 1.

ПЕСНЬ 7

Ирмос: Отроцы еврейстии в печи попраша пламень дерзновенно и на росу огонь преложиша, вопиюще: благословен еси, Господи, Боже отец наших.

Чином безплотным равноангельским житием твоим, святителю Уаре, уподобился, денно и ношно сладостно Богу служил еси. Вышнему Престолу Благодати в храмах предстоя, Божественную Жертву безкровную совершая, благодарно пел еси: благословен еси, Господи Боже, во веки.

Услышал еси блаженный глас Христов, аще кто хочет вслед Мене идти, да отвержется себе, и возмет крест свой. Исполнити сие пламенно вожделев, даже до смерти мученическа Христу Богу себе вручил еси,

Уаре благопослушливе, вопия: благословен еси, Господи Боже, во веки.

Слава: Манием Божественным посреде огня богохульнаго безумия, огнем отеческаго благочестия осияваем, явился еси яко огнезрачный Серафим. Паству свою от волков губящих ю, усердно сохраняше, непрестанно вопия: благословен еси, Господи Боже, во веки.

И ныне: Твоего чрева не опали Божества Огонь, Дево Мати, воплощься из Тебе, концы вселенныя орошая Божественными Светлостьми, темже Тя поем во вся веки.

ПѢСНЬ 8

Ирмос: Победители мучителя и пламене благодатию Твоею бывше, заповедем Твоим зело прилежаще, отроцы вопияху: благословите вся дела Господня, Господа.

Излияся благодать во устнех твоих, священномучениче Уаре, добрый архипастырю Липецкий. Вся бо учил еси прилежно поклоняться Творцу в Троице единому и Тому работати, вопия: благословите вся дела Господня, Господа.

Царю Превечному благоугождая в житии твоём, Уаре досточудне, к предержавшим безбожным властем веден был еси, яко Царя царствующих и Господа господствующих служитель верный. От оных же истязаем был еси в земли Казахстей, вопия: благословите вся дела Господня, Господа.

Слава: Яко добропобеднаго в мученицех и преславнаго во святителех стяжавши тя, богоблаженне священномучениче Уаре, поместная Церковь твоя, Прославльшаго тя прославляюще, и тя, благаго раба и вернаго слугу Господня восхваляюще, вопиет: благословите вся дела Господня, Господа.

И ныне: Хотением вся совершая, Спас наш, восхотел еси во чрево Твое, Всенепорочная Благословенная, вселиться, и плотски явиться, и обожи нас, истлевших прежде льстивого змия советом.

ПЕСНЬ 9

Ирмос: Устрашися всяк слух Неизреченная Божия снисхождения, яко Вышний волею сниде даже и до плоти, от Девического чрева быв человек. Темже Пречистую Богородицу, вернии, величаем.

Дарами Духа Святаго исполненный, во благовестии Христове ревностно подвизался еси, богомудре святителю Уаре. Липецкия пределы, степи Казахская с проповедью Православия обтекл еси. И ныне в них живущия молитвами твоими от безбожия и зловерия спасай, священномучениче и пастырю досточудне Уаре.

Яко розга винограда истиннаго быв, добр плод в пособие православным принесл еси, отче святителю Уаре. Сладость блаженнаго Царства Христова нам источи, от Него же пьюще, здравие душевное и телесное приемлем, хвалящи тя, источниче любви и столпе премудрости.

Тело твое в честен храм Святому Духу устроил еси, блаженне отче Уаре, душу твою в Обители Небесныя устремил еси, дух же твой, любовь к Богу горящий, по страдальчестей кончине твоей в руке Божии предавай, и нас путем твоим шествовати настави, Боголюбче, свет веры Христовы нам источая.

Слава: Яко солнце светозарно, света Евангельскими истинами вся концы Липецкия земли озаряя присно, возсия нам добропобедная память твоя, блаженне священномучениче Уаре. Темже с любовью зовем ти: огради грады и веси Отечества нашего невредимы от всех навет вражиих, спаси люди паствы твоя, мир и безмятежие тем даруя, угодниче Божий Новоявленный.

И ныне: Страшуся Твоего, Едине Царю, Второго пришествия, ибо безмерно согреших Тебе. Но яко Сый благ, обрати и спаси мя, Рождшия Тя, Иисусе, благоприятными мольбами.

МОЛИТВА

О, священная главо, архипастырю предобрый словеснаго стада своего, Новомучениче Христов Уаре, теплый и неусыпный о нас заступниче в скорбех и бедах и во всяких нуждах! Услыши нас грешных и недостойных, молящихся тебе, испроси нам веры православныя утверждение, на всеблагое Божие промышление надежды укрепление, любви к Богу и ближним нашим умножение, мудрости небесныя снискание. Да пребудет щедрое благословение Царя Славы, Господа нашего Иисуса Христа, над странною нашею и градом Липецком, да избавимся от труса, огня, междуусобныя брани, глада и мора и иныя пагубы; но да будет в нас, ходатайством твоим, святе, мир, братолюбие друг ко другу сердечное, благочестие и послушание, душевных и телесных сил крепость и здравие, радость и тишина духовная. Да тако в веце сем скоропреходящем поживше, с тобою, Святителю наш милостивый, на вечных пажитех Христовых со Всеми Святыми обрящемся, в чертозех Бога нашего, во Святей Троице от небесных и земных воспеваема и поклоняема во веки веков. Аминь.

